


MAKTABGA SAYOHAT

O'quvchiga esdalik

Bo'lay desang bog'bon
Yo Vatanga posbon,
Yo osmonda uchuvchi,
Yo dengizda suzuvchi,
Nimaki qilsang tilak
Bariga o'qish kerak.
O'quvchi sendan talab:
Maktabga bor ertalab,
O'qi, berib mehringni,
Qo'yib ko'ngil, zehningni.

Quddus Muhammadiy



Akmal, maktabimizda sinf xonalaridan
boshqa yana qanday joylar bor?

Kel, buni birgalikda bilib olamiz.



Bu – sinf xonasi. Bu yerda dars o'tiladi, bolalar turli fanlarni o'rganadilar. Siz qanday fanlarni o'rganyapsiz?



Sinf xonasi

Bu – maktab yo'lagi. Bu yerda tanaffus payti o'quvchilar vaqt o'tkazishi mumkin. Yo'lakda yugurish va shovqin solish mumkin emas.

Nima uchun?



Maktab yo'lagi




Yodda tuting

- Maktabda telefondan foydalanishning tartib-qoidalari bor:
- maktab hududida telefon qo'ng'irog'ining ovozini pasaytirib qo'yish kerak;
 - dars boshlanishidan oldin telefonni o'chirib, portfelga solib qo'yish zarur.



Sport zalida jismoniy tarbiya mashg'ulotlari o'tkaziladi. Bu yerda o'quvchilar jismonan chiniqadilar. Sport zaliga o'qituvchi boshchiligida kirgan ma'qul.

Nima uchun?



Sport zali

Maktabdagi yig'ilish va bayramlar ijod zalida o'tkaziladi. Bu yerda sahna hamda tomoshabinlar uchun o'rindiqlar mavjud.

Bolalar sahnada o'z qobiliyatlarini ko'rsatadilar, qo'shiq kuylaydilar va raqsga tushadilar.

Ijod zalida o'quvchi o'zini qanday tutishi kerak?



Ijod zali

Maktab oshxonasida o'quvchilar ovqatlanishlari mumkin. Ovqatlanishdan oldin va keyin qo'llarni yuvish odobdandir. Ovqatlanayotgan paytda telefonga chalg'imaslik kerak.

Maktab oshxonasida o'quvchi o'zini qanday tutishi kerak deb o'ylaysiz?

**Maktab oshxonasi**

Kitob – bilim olish manbalaridan biri. Maktab kutubxonasida turli qiziqarli kitoblar saqlanadi. O'quvchilar kutubxonadan kitob olishlari va o'quv zalida o'qishlari mumkin.

Kitoblarni o'qish uchun uyga olib ketish ham mumkin. Biroq ularni kutubxonaga o'z vaqtida, butun holda qaytarish kerak.

Siz qanday kitoblar o'qishni yoqtirasiz?

**Maktab kutubxonasi**

Har bir maktabda tibbiyot xonasi mavjud. Kimdir jarohat olsa, o'zini yomon his qilsa yoki isitmasi chiqsa, maktab shifokori unga yordam ko'rsatadi.

Yana qanday holatlarda maktab tibbiyot xonasiga murojaat qilinadi?



Tibbiyot xonasi

Maktab psixologi – qiyin holatlarda yordam berib, qo'llab-quvvatlaydigan mutaxassis.

O'quvchi maktabda, uyida yoki ko'chada og'ir vaziyatga tushsa, bu haqda psixolog bilan gaplashishi mumkin. G'azab, hayajon yoki xavotirini ichda saqlash kerak emas. Agar bolalar bilan biror kor-hol ro'y bersa, maktabdagi kattalar ularga yordam berishga tayyor.



Psixolog xonasi

Hojatxona nima uchun kerakligini hamma biladi. Uni toza saqlash birinchi navbatda sog'lig'imiz uchun muhim hisoblanadi. Hojatxonadan tartibsiz foydalanish, eshiklar va devorlarni tepib, ularga chizish, iflos qilish, gigiyena qoidalarini buzish tarbiyasizlikka kiradi.

Hojatxonadan foydalanib bo'lgach:

- qog'ozni axlat qutisiga tashlash;
- suv tushirgichni ishlatish;
- qo'llarni sovunlab yuvish kerak.

Qo'l yuvish qoidalarini bilasizmi?




Maktab hovlisi maktab atrofidagi o'ralgan hudud hisoblanadi. Bu yerga daraxt va gullar ekish mumkin. Ekilgan gullarni yoki daraxtlarni asrab-avaylash va gulzorga aylantirish kerak.





Maktab hovlisida sport maydonchalari bo'ladi. Bu yerda issiq kunlarda jismoniy tarbiya darslari, sport musobaqalari o'tkaziladi.

Sport maydonchalarida qanday jismoniy mashqlar va sport turlari bilan shug'ullanish mumkin?



Sport maydonchasi



Yodda tuting

Evakuatsiya – odamlarni xavfli hududdan olib chiqish.

Ba'zan maktabda yong'in, gaz sizib chiqishi yoki zilzila singari kutilmagan hodisalar sodir bo'lishi mumkin. Bunday hollarda o'quvchilarni qutqarish uchun maktab devorlariga evakuatsiya rejalari ilib qo'yiladi.



O'qituvchi yordamida o'rganing

Evakuatsiya rejasidagi belgilarga diqqat qiling.

← asosiy evakuatsiya yo'li




yong'in o'chirish vositasi



olov o'chirgich



yong'indan ogohlantirish tugmasi





Og'zaki topshiriq

Bu faoliyatlar bilan o'quvchilar maktabning qaysi xonalarida shug'ullanadilar?



Bo'yang

1. Dars siz uchun qiziqarli bo'ldimi?



2. Dars mazmuni tushunarli bo'ldimi?

